



浙江圖書館



大學中庸

浙江省立

圖書館

587.9

登記
號碼

分類
號碼

097.01
4772
C2

冊

來源

浙 江 圖 書 館

大學中庸

四書拾義三



績溪胡紹勳學省立圖

壹是

理館書之章

大學壹是皆以修身為本鄭注云壹是專行是也勳
按說文訓壹為專壹與一義殊穀梁僖九年傳壹盟
天子之禁注云壹猶專也左氏昭二十六年傳壹行
不若注云壹專也荀子六畧篇君子壹教弟子壹學
亟成注亦云壹專壹也並與說文合是字統承上文
八條目言謂自天子以至於庶人專在八條目中用
功此外並無別學而其本則在修身故曰皆以修身

352340

142392

四書抄義 卷三
爲本依鄭注壹是二字連上句讀一連下句讀孔疏
不得其義乃云所行此者專壹以修身爲本一似經
文是字皆字俱可從刪而語意反晦

緝熙

於緝熙敬止勲按詩言緝熙不一敬之詩學有緝熙
于光明主學言也維清詩維清緝熙文王之典與昊
天有成命詩於緝熙單厥心一以守法言一以承業
言也惟文王詩於緝熙敬止專主德言據爾雅釋詁
訓緝熙爲光周語引昊天有成命詩而釋之曰緝明
也熙廣也韋注引鄭後司農云廣當爲光文王詩傳

云緝熙光明也鄭箋因之維清敬之二箋同禮記緇衣於緝熙敬止注云緝熙皆明也大學注亦無異訓蓋爾雅訓緝熙爲光國語以光明分屬明者光之體光者明之用言用亦可以包體也若緝之訓續如詩行葦投几有緝御箋云緝猶續也緝雖有繼續之義若緝熙連文則爾雅國語之訓確不可易

於戲

詩云於戲前王不忘今烈文詩於戲作於乎卽烏呼也說文烏孝鳥也象形孔子曰烏呼也取其助氣故呂爲烏呼又於篆注云象古文烏省此卽今之於

字於與烏體異而字同烏之本義爲孝烏凡經傳烏呼之烏皆借字也毛詩烏呼皆作於乎於亦借字也戲又呼之借字說文訓戲爲三軍之偏如史漢項羽紀高帝紀皆云諸侯罷戲下是也借戲爲呼者古音呼聲與戲聲爲通韻字可互借古戲字本讀平聲並無去聲又與呼爲雙聲故尙書古文烏呼字今文皆作於戲如盤庚丕乃崇降弗祥烏呼君爽烏呼君已曰立政烏呼孺子王矣隸釋石經尙書殘碑皆作於戲無逸周公曰烏呼嗣王其監于茲漢石經作於戲康誥王曰烏呼封王符潛夫論作於戲召誥烏乎若

生子漢石經及論衡率性篇皆作於戲又漢書東方朔傳先生曰於戲楊王孫傳於戲古不爲也佞幸董賢傳於戲傷哉皆借戲爲呼也江晉三先生云借戲爲呼者蓋戲从盧聲盧又从虍聲也似古音戲字本在魚部而先秦漢初轉入歌部總由魚歌二部通用之故惜先秦以前有韻之文無可引證

諺

故諺有之曰注疏諺字無訓後人多以俗語當之據廣雅釋詁四云諺傳也說文云諺傳言也漢書季布傳集注依廣雅釋諺爲傳後漢虞翻傳注依說文釋

四書指掌 卷三
諺爲傳言皆謂前代相傳之古語六心雕龍訓諺爲
直言猶不以爲俗語此經諺字陸氏釋文訓爲俗語
與左傳隱十一年周諺有之曰釋文訓爲俗言同又
據越語諺有之曰注云諺俗之善謠者漢書五行志
中之上諺所謂老將知而耄及之者注云諺俗所傳
言也是訓俗語起於唐人而非古義

貪戾

一人貪戾鄭注云戾之言利也勲按戾與利古音同
部又爲雙聲鄭以戾爲利借字故正其讀曰戾之言
利戾本義說文訓曲引伸之爲乖戾暴戾罪戾之稱

此經借戾爲利猶秦策虎者戾蟲亦借戾爲利也彼
注訓戾爲貪與廣雅釋詁訓利爲貪合貪與利散文
則通對文則異貪利者惟利是貪也疏未證明其義
老老長長

上老老上長長鄭注云老老長長謂尊老敬長也勲
按注謂尊老敬長疑指國人之老者長者言孔疏未
申其說蓋傳以釋經未有傳義不與經旨合者如上
節釋治國必先齊家專重齊家而治國卽由家齊致
之故言孝弟慈三者皆齊家事此節釋平天下在治
國專重治國而天下平卽由國治出之故言老老長

四書抄註 卷三
長恤孤三者皆治國事卽以恤孤論孤必無父不得指爲人君子孫孤旣爲國中之孤復以老與長爲家中之老者長者則上二句與下一句文法畧同不應意義獨別孟子梁惠王篇老吾老以及人之老幼吾幼以及人之幼天下可運於掌老吾老者齊家事也證老老長長兼及國人而天下平之基在此若齊家一層上節已言孝弟孝卽老吾老弟卽長吾長也如謂老老爲吾老長長爲吾長旣與本節經旨違亦與上節傳義複矣

興孝興弟

上老老而民興孝上長長而民興弟興不獨訓起亦可訓喜禮記學記不興其藝鄭注云興之言喜也正義引爾雅云歆喜興也興亦通作媿廣雅媿喜也說文訓媿爲說與喜義同興孝興弟者感上之老老長長而自喜於孝弟也興仁興讓倣此孟子聞文王作興曰之興亦卽喜說之意

休休然

其心休休然章句未詳其義勲按書傳訓休休爲樂善詩蟋蟀良士休休毛傳云休休樂道之心廣雅釋

詁亦訓休爲喜喜樂皆謂之休周語爲晉休戚戚與
休相反戚爲憂休卽爲喜樂矣至爾雅釋訓休休與
瞿瞿同訓儉專以釋詩蓋蟋蟀詩本刺晉僖公儉不
中禮故言士之儉而中禮者曰良士休休與大學異
義

兩端

中庸執其兩端鄭注云兩端過與不及也勲按其字
指揚善之善言善不必皆中亦或有過有不及故曰
兩端過不及皆非中則自有其中在矣故又曰用其
中於民中與過不及反對非過不及無以釋兩端

罟獲陷阱

驅而納諸罟獲陷阱之中孔疏云罟網也獲謂柞鄂也陷阱謂坑也穿地爲坑豎鋒刃於中以陷獸也勲按秋官雍氏注云豎地阱淺則設柞鄂於其中賈疏云或以爲豎柞於中向上鄂鄂然所以載禽獸使足不至地不得躍而出然則罟者張網以捕之獲者設柞以獲之陷者深坎以沒之阱者穿地以襲之陷與阱本一物獲亦施於陷阱中唯罟可取獸兼可取禽與獲陷阱異

戾天

詩云鳶飛戾天天者氣也張湛列子注云自地以上則皆天矣楊倞荀子注云天無實形地之上空虛者盡皆天也此皆以氣為天故論衡談天云天氣也鵠冠子秦錄云天者氣之所總出也蓋氣之清輕者上為天據易大畜大象傳天在山中非氣何以在山中乎惟氣之所至皆名天故鳶不飛則已飛即謂之戾天可也

其則

詩云伐柯伐柯其則不遠鄭注云則法也言持柯以伐木將以為柯近以柯為尺寸之法勳按攻木之工

必用斧斧柄謂之柯柯長三尺可以量物如考工記
車人爲車柯長三尺博三寸厚一寸有半五分其長
以其一爲之首轂長半柯其圍一柯有半輻長一柯
有半渠三柯者三此造車以柯爲則亦不謂遠况以
柯伐柯者乎執柯伐柯正與以人治人之旨合

及士庶人

斯禮也達乎諸侯大夫及士庶人不云及庶人而云
及士庶人者禮及士而止庶人又從士而及之也曲
禮云禮不下庶人白虎通云禮爲有知制不及庶人
勉民使至於士也勲按庶人假士禮行之如儀禮嘉

禮有士昏士冠凶禮有士喪士虞皆庶人假而行之者也

宗器

陳其宗器鄭注云宗器祭器也勲按左傳襄二十五年賂晉侯以宗器樂器注云宗器祭祀之器與中庸鄭注合皆不詳其器名據禮記雜記下凡宗廟之器其名者成注云宗廟名器謂尊彝之屬此特專指名器而言若統言宗器凡祭祀所當用者無不備不專指尊彝之屬可知也宗器卽宗廟之器說文訓宗爲尊祖廟从宀从示言宗可該廟故宗廟之器通稱宗

器猶儀禮士昏禮記承我宗事宗廟之事亦通稱宗
事也宗器與寶器異周禮天府掌祖廟之守藏凡國
之玉鎮大寶器藏焉若有大祭大喪則出而陳之此
寶器卽重器如孟子止其重器趙注亦訓爲寶重之
器書顧命所陳赤刀大訓天球河圖諸器正謂大喪
獨春秋所陳旣非大喪亦非大祭大祭若大禘大饗
與時祭不同故知春秋不必陳寶器又周禮典庸器
掌藏庸器及祭祀陳庸器注云庸器伐國所獲之器
若崇鼎貫鼎及其兵物所鑄銘也是庸器亦祭祀
所陳然庸器用以昭功非祭祀常器蓋宗器爲祭器

國語其官不備宗器指此若襄二十二年左傳寡君
盡其土實重之以宗器注云宗廟禮樂之器鐘磬之
屬此又兼以樂器爲宗器可補中庸注所未詳

人也

書

仁者人也鄭注云人也讀如相人偶之人以人意相
存問之言勲按表記仁者人也注云人也謂施以人
恩也春秋傳曰執未有言舍之者此其言舍之何人
也疏云引之者證人是人偶相存愛之義也意與中
庸注合又方言凡相憐哀相見驩喜九嶷湘潭之間
謂之人兮呂氏春秋論人篇哀之以驗其人此皆相

親愛相悲憫之謂故釋名廣雅俱訓人爲仁人與仁無二理猶宜與義無二理也

困而知之

或困而知之鄭注云困而知之謂長而見禮義之事已臨之而有不足乃始學而知之勲按論語生而知之者章困而學之孔注云困謂有所不通明是困而後學正與困而後知同若時解不考鄭孔注竟謂用困的工夫求知則困而學之當亦用困的工夫爲學不知困而不學又作何解也此經下章事前定則不困及學記教然後知困皆合臨事不足之義困而知

之者因困求知功益加密故云及共知之一也廣雅
釋詁四訓困爲窮亦與孔鄭注義合

從容

從容中道聖人也正義以爲從容閒暇而自中乎道
勲按孟子盡心下動容周旋中禮者與此經文義相
似彼言動容此言從容從容卽動容也古音從聲動
聲同部動又从重聲古亦作平聲讀如文子原道篇
不虛動兮與通叶徐幹齊都賦征鼓雷動與中叶是
從與動聲相近從卽動之聲近借字如墨子經上云
動或從也亦其一證惟從容卽動容故解從容者多

指爲舉動如廣雅釋詁云從容舉動也禮記緇衣從容有常疏及楚辭懷沙孰知余之從容注文選琴賦從容祕翫注並與廣雅釋詁同蓋從容固有閒暇一義在此經訓舉動爲優書

無疆

悠久無疆疆卽亘之或體字說文訓界有界則有限無疆者無界可限也詩言無疆者不一皆以壽言卽悠久之義也易坤卦象傳三言無疆始云坤厚載物德合無疆繼云牝馬地類行地無疆末云安貞之吉應地無疆行地無疆者言牝馬卽言坤之本體也德

合無疆者言坤德之無疆合乾德之無疆天地同一
無疆也應地無疆者言君子法地之無疆即法天之
無疆以天地同一悠久之無疆也蓋天行不息其高
明本自無疆地之博厚能配天則亦無疆至誠之悠
久與天地合無疆之本義主地言如臨之大象傳言
容保民無疆指坤地也天與人皆言無疆此引伸之
義也

生物不測

其為物不貳則其生物不測鄭注云言至誠無貳乃
能生萬物多無數也疏云言聖人行至誠接待於物

不有差貳以此之故能生殖衆物不可測量勲按說
文測深所至也深所至爲測量其深所至亦爲測說
文解測字專以本義言之至極也言深之至極處也
極與盡義同故呂覽下賢篇其深而不測也注淮南
原道篇深不可測注主術篇深不可測注並訓測爲
極呂覽論人篇不可測也注亦云測盡極也義皆與
說文合不測卽不極猶言無窮也下節天言無窮水
言不測不測卽無窮孔疏以爲不可測量失之矣

敦厚

敦厚以崇禮敦與厚同義如孟子莠章下薄夫敦韓

詩外傳引作薄夫厚經注亦以厚釋敦但敦厚散文則通連文則異此經敦厚連文厚爲本質敦爲加功非複語也據說文厚爲山陵之厚古文厚从土作𡗗厚莫厚於土敦卽主土而言如易繫辭上傳安土敦乎仁卽敦厚之一義也坤艮皆土故爻位之值坤艮者多言敦如復外卦爲坤土六五言敦復臨外卦爲坤土上六言敦臨艮內外卦皆土上九亦言敦艮厚益加厚取象於敦古人用字之精如此敦當作惇說文心部惇厚也支部敦怒也詆也一曰誰何也俗多誤混

足以興

國有道其言足以興鄭注云興謂興起在位也勳按
訓興爲起本爾雅釋言禮記曲禮下唯興之日鄭注
云興謂起爲卿大夫與中庸注合但興訓起亦訓舉
如廣雅釋詁云興舉也周禮大司徒之職以鄉三物
教萬民而賓興之注云興猶舉也舉與起皆可謂興
獨起由己不由人如孟子所謂有王者起是也此經
言君子處有道時正當興賢興能之日特慮言不足
以興耳足以興者見君子言皆可斥也

同文

書同文文者六書之文也許氏說文序云倉頡之初
作書蓋依類象形故謂之文其後形聲相益卽謂之
字據此文與字稍異依類象形專謂指事象形二者
指事亦所以象形也文本錯畫交錯其畫而文成考
其實六書通稱文也六書雖有指事象形象聲會意
轉注假借之異而皆以文成體同文者六書之文無
不同如指事謂明指其事文同而事可知象形謂各
象其形文同而形可知象聲者以文兼聲文同則聲
自得矣會意者以文合意文同則意自見矣若以此
文釋彼文以彼文釋此文謂之轉注同一轉注卽同

一文也以彼文代此文以此文代彼文謂之假借同
一假借卽同一文也周禮外史掌達書名於四方名
者文也達之者同其文之謂也

潛

書

詩云潛雖伏矣潛卽涔也亦謂之糝或作櫛如周頌
潛有多魚韓詩潛作涔訓爲魚池毛傳云潛糝也勳
按爾雅釋器糝謂之涔李巡云今以米投水中養魚
曰涔孫炎云積柴養魚曰糝郭璞云今之作糝者聚
積柴木於水中魚得寒入其裏藏隱因以薄圍捕取
之據小爾雅魚之所息謂之櫛舊詩傳及爾雅本並

作米旁參郭氏因改爾雅從小爾雅作木旁參專取
 積柴之義是也潛卽涔之借字故韓詩作涔又禹貢
 沱潛旣道史記夏本紀沱潛作沱涔亦二字通用一
 證字林椽又作𣪞亦通用字古音替聲岑聲參聲林
 聲同部彼此互通說文訓潛爲涉水一曰藏也藏卽
 經傳通行之義若以此釋正月詩之潛則與伏羲無
 別以是知潛當讀爲涔詩若曰魚入積柴中雖甚隱
 伏而人明知之其伏焉者卽其昭焉者也

屋漏

詩云相在爾室尙不愧於屋漏此天子陽厭禮也毛

傳云西北隅謂之屋漏鄭箋云相助諸侯卿大夫助祭在女宗廟之室尙無肅敬之心不慚愧於屋漏有神見人之爲也屋小帳也漏隱也禮祭於奧旣畢改設饌於西北隅而扉隱之處此祭之末也孔疏云屋漏者屋內處所之名可以施小帳而漏隱之處正謂西北隅也言不愧屋漏則屋漏之處有神居之矣故言祭時於屋漏有事之節禮祭於奧中旣畢尸去乃改設饌食西北隅扉隱之處此祭末之時事也特牲禮尸謾之後云佐食徹尸薦俎敦設於西北隅几在南扉用筵納一尊佐食闔牖戶降注云扉隱也不知

神之所在或諸遠人乎尸謾而改饗爲幽闇庶其饗之是其事也若然當闔戶牖則室中無人而云在室不愧屋漏者此羣臣雖惰非祭初卽倦當有事屋漏之時乃始倦耳因當時屋漏有神而責其不愧非謂助祭之人在屋漏之處言其室者正謂在宗廟中耳爾雅孫炎解屋漏云堂室之白日光所漏入非鄭義也按禮記曾子問云殤不備祭何謂陰厭陽厭鄭注云祭成人始設奠於奧是謂陰厭尸旣謾之後改饗於西北隅是謂陽厭按特牲士禮有陰厭陽厭又此詩不愧於屋漏則天子亦有陽厭以上下言之諸侯

亦同惟上大夫無陽厭故儀禮少牢祭末不徹饌於西北隅鄭注云無陽厭者爲大夫當有賓尸故也勲按曾子問當室之白尊於東房是謂陽厭注云當室之白謂西北隅得戶明者也明者曰陽又特牲饋食禮佐食徹尸薦俎敦設于西北隅注云少牢饋食禮曰南面如饋之設此所謂當室之白陽厭也以上鄭氏兩注皆與毛傳合蓋奧在西南當室之闔故曰陰厭屋漏在西北當室之明故曰陽厭陰厭席東面陽厭席南面儀禮特牲有陰厭有陽厭少牢有陰厭無陽厭天子諸侯及上大夫正祭有陰厭繹祭有陽厭

下大夫與士無賓尸釋祭故陰厭陽厭其設於祭之日而已抑詩衛武公作以刺厲王亦以自警不愧屋漏確指繹祭陽厭之時據本詩下文接神之格思三句亦主祭祀言中庸使天下之人節卽引是詩證之彼神之格思三句屬祭祀則相在爾室二句爲祭祀之陽厭明矣鄭箋訓屋爲小帳與注雜記素錦以爲屋同據此當讀屋爲幄釋名釋牀帳云幄屋也以帛依板施之形如屋也是幄本取屋義亦可省文作屋故鄭氏以爲小帳汪君手存云澤按劉熙釋名云禮每有親死者輒撤屋之西北隅薪以爨竈煮沐供諸

喪用時若值雨則漏故以名之也必取是隅者禮既祭改設饌於西北隅今撤毀之示不復用也太平御覽引舍人注畧同鄭君箋詩訓屋爲幄漏爲隱謂施小帳於西北隅漏隱之處以依神故名其處曰屋漏竊謂鄭君是也釋言云屏陋隱也陋與漏屋與幄聲韻同則義亦通屋漏卽幄陋鬼神所居尙幽闇而室中幽闇之地莫如西北隅故常設小帳於此以依神祭時設席於西南隅之奧尸謬後仍改饌於此以厭飫之平時之薦而不祭者亦陳設於此故名此處爲屋漏也劉熙說雖有據然訓漏爲雨漏之漏則旣撤

之後應卽修復何至常常雨漏而以名其地乎曾子
問當室之白鄭以西北隅得戶明釋之茲乃釋西北
隅之地非釋屋漏二字名義也蓋西北隅最幽闇戶
開日光斜入時見白光故曰當室之白故曰得戶明
曾子問經注與抑詩箋原並行不背孫炎專主曾子
問以釋爾雅而增成其義曰日光所漏入要不如抑
詩箋之確勲按漏之本義爲刻漏說文漏呂銅受水
刻節晝夜百節从水扇取扇下之義扇亦聲據此漏
與扇有別扇從屋穿水下會意漢書地理志下交趾
郡苟扇尙用扇字他典多借漏爲扇如荀子儒效篇

窮閭漏屋注云漏屋弊屋漏雨者也此與釋名值雨則漏之說同不知此亦借漏爲陋也漏屋猶云陋室說文陋訓阨陝此本義也引伸其義凡隱處亦可稱陋爾雅釋言訓陋爲隱郭注引尙書揚側陋釋之今按堯典明明揚側陋孔疏不得其義乃云側陋者僻側淺陋之處顯與書序義違舜典序云虞帝側微正以側微釋側陋正義亦謂此云側微卽堯典側陋也微與隱同義足證陋可訓隱而釋言之義明並詩箋之義亦明鄭知漏爲陋之借字故詁陋爲隱此經借漏爲陋猶禮記內則馬黑脊而般臂漏借漏爲螻也

鄭注內則云漏當爲蝮詩箋不破字者以漏陋二字同音通用較廣後人易明故不煩發疑正讀也由此推之舍人劉熙值雨則漏之說亦附會而不足據且與孫炎皆未知漏爲陋之借字也抑舍劉二君之說皆本於禮記喪大記云甸人取所徹廟之西北扉薪用爨之正義云謂正寢爲廟神之也引皇氏說云扉謂西北隅扉隱之處徹取屋外當扉隱處薪扉卽屋漏之地如特牲饋食薦俎敦設於西北隅几在南扉扉在西北隅非屋漏乎扉與屋漏異名而因地爾雅釋言訓扉爲隱玉篇卽訓扉爲陋是漏之本字爲陋

陋亦通名屏皆西北隅幽闇之稱既無關於雨漏亦
不係於漏入之日光矣

浙江圖書館

四書拾義三

汪
運運錯鏈校字



浙江圖書館

孟子

四書拾義四

續溪胡紹勳學

易耨

梁惠王深耕易耨趙注云易耨芸苗令簡易也勳按
耨說文作耨訓爲耨器或从金作耨本指鋤而言引
伸其義凡芸苗皆可稱耨經籍通作耨此經易耨與
深耕對文不徒令苗簡易有速義如史記天官書
易福薄集解引徐廣云易猶輕速也蓋以時雨將至
速耨以待之不容少緩故曰易耨速與疾同義如齊
語深耕而疾耨之以待時雨其明證也又管子度地

篇大暑至利以疾耨疾耨卽易耨矣

戚戚

於我心有戚戚焉趙注云戚戚然心有動也勲按戚之本義訓親如詩行葦戚戚兄弟毛傳云戚戚內相親也疏云戚戚猶親親然博考訓詁家言無有釋戚爲動者此經趙注訓戚戚爲動蓋以戚爲倝之借字也古音戚从耒聲倝从叔聲叔亦从耒聲聲通字亦通故借戚爲倝如爾雅釋詁動與倝皆訓作則二字義同方言十二亦訓倝爲動趙注之義本此

寡妻

刑於寡妻趙注云刑正也寡少也言文王正己適妻則八妾從勲按毛傳云刑法也寡妻適妻也鄭箋云寡妻寡有之妻言賢也趙注訓刑爲正從韓詩說與毛傳依釋詁訓法者相兼乃備以寡妻爲適妻適妻惟一故稱寡對衆妾而言也又爲寡有之義如書言寡兄謂寡有之兄此亦爲寡有之妻也傳箋異訓義皆可通若以寡爲寡德此自謙之辭恐非詩人語氣

混夷

文王事混夷趙注云詩云混夷允矣唯其喙矣謂文王也正義云箋云混夷夷狄國也見文王之使者將

士衆過己國則惶怖驚走犇突入柞械之中而逃甚
困劇也又云駮突也喙困也趙注引此而證以解作
文王事混夷大與詩注不合今孟子乃云文王事混
夷者混夷西戎之國也詩之采薇云文王之時西有
混夷之患注云混夷西戎也是也今據詩之箋云乃
曰伐混夷與孟子不合者蓋文王之始初事卒不免
故伐之也始初之時乃服事殷之時也趙注引混夷
允矣唯其喙矣蓋失之矣汪君手存云謹按縣詩肆
不殄厥愠亦不隕厥問柞械拔矣行道允矣混夷駮
矣維其喙矣箋云小聘曰問文王見大主立冢土有

用大衆之義故不絕去其恚惡惡人之心亦不廢其
聘問鄰國之禮今以柞械生柯葉之時使大夫將師
旅出聘問其行道士衆允然不有征伐之意混夷見
文王之使者將士衆過已國則惶怖驚走奔突入此
柞械之中而逃甚困劇也是之謂一年伐混夷孔疏
申之云書傳四年伐犬夷此云一年者此文在虞芮
質成之上或在受命之前非彼四年之事混夷見聘
而怖終不臣伏故至受命四年而伐之此因混夷之
驚遂言其伐之事不謂此卽伐也據此則縣詩所云
正合孟子以大事小之意趙氏引以證孟子確甚不

必帝王世紀而始瞭然也而帝王世紀更足以證鄭箋趙注之說邵武僞疏謂趙注與詩箋不合誤矣勳按混夷地兼西北據出車詩云赫赫南仲薄伐西戎西戎卽指混夷也混夷在獫狁西故云西戎不必在極西邊地也鄭箋謂混夷爲夷狄國亦未必卽在東北之間蓋混夷地居西北之間故或以爲西或以爲北繇詩與采薇所言同一混夷據漢書匈奴傳周西伯昌伐畎夷師古注云畎夷卽畎戎又據曹植求自試表引孟子事混夷作事犬夷犬夷卽混夷尙書大傳文王受命四年伐犬夷鄭君注亦云犬夷混夷也

犬或作𤝵猶昆本作混如緜詩混夷馱矣說文引詩
同孟子音義石經昆亦作混然則混爲正字閩監毛
三本皆作昆者通用字也又作串如皇矣詩串夷載
路箋云串夷卽混夷焦氏孟子正義云串同患與混
一音之轉串亦與犬一音之轉是也蓋如緜詩箋義
乃混夷自相竄伏何傷文王以大事小之仁厥後爲
中國患文王承天子命伐之天下之公義也仍與字
之之心並行不悖

不足不給

春省耕而補不足秋省斂而助不給趙注云春省耕

補耒耜之不足秋省斂助其力之不給也疏云春則省察民之耕而食不足者則補之如周禮旅師春頒其粟是也秋則省察民之收而有力不足者則助之如遂師巡其稼穡而移用其民以救其時事是也勲按鄭氏注遂師云移用其民使轉相助救時急事也四時耕耨斂艾芟地之宜早晚不同而有天期地澤風雨之急其引旅師者彼職云掌聚野之耬粟屋粟閒粟而用之以質劑致民平頒其興積施其惠散其利而均其政令又云凡用粟春頒而秋斂之鄭注云困時施之饒時收之疏云上經所云是貨而生利此

經所云是直給不生利也官得舊易新民得濟其困
乏官民俱益之也據此則補不足亦是春頒粟秋仍
斂之但不生利耳如此說補不足助不給可以通行
爲諸侯所取法若時解以爲補不足助不給俱是發
倉廩以補助之是謂不給卽不足也如必每年春秋
俱發倉廩恐亦難周况當秋斂非甚凶荒無有不足
據說文給相足也周語事之供給注晉語伎藝畢給
則賢注知羊舌之聰敏肅給也注皆訓給爲足然足
爲給之本義引伸其義亦與及同如晉語豫而後給
注云給及也漢書鼂錯傳弗能給也注云給謂相連

及然則助不給正謂助其事之所不及也恐其不及則早斂者使晚斂者轉相助晚斂者使早斂者轉相助專主人力而言與發倉廩無涉

方命

書

方命虐民趙注云方猶逆也逆先王之命疏云凡物圓則行方則止行則順止則逆勳按疏未得其義方當讀爲放方放古字通如書堯典方命圯族此古文尙書作方也漢書王商史丹傳喜傳作放命圯族薛宣朱博傳亦然此皆今文尙書也五帝本紀放作負直以訓詁字代之放命者放棄王命也或訓負大意

畧同

始興發

於是始興發補不足趙注云始興惠政發倉廩以賑
貧下不足者也勲按趙注訓發爲發倉廩灼然無疑
惟以興爲興惠政未確興卽興此發倉廩之舉此舉
久廢因景公說晏子言而復興之故曰始興一言發
而惠政在其中矣興對廢言尤見經文本自顯白

熒獨

詩云哿矣富人哀此熒獨勲按周禮大司寇之職以
肺石達窮民凡遠近惇獨老幼之欲有復於上而其

長弗達者立於肺石三日注云無兄弟曰惇無子孫
曰獨賈疏云鄭知惇是無兄弟者王制已有孤獨寡
鰥不見惇則惇是無兄弟可知也是以尙書洪範亦
云無虐癸獨而畏高明孔傳云癸單無兄弟也無子
曰獨據周禮疏不言無子曰獨兼言無孫者或子死
有孫亦不爲獨故兼言無孫也癸說文作癸回疾也
謂回轉之癸飛也引伸爲癸獨取裴回無依之意今
詩小雅癸作惇字異而聲義並同

戚揚

于戈戚揚毛傳云戚斧也揚鉞也正義曰廣雅云鉞

戚斧也則戚揚皆斧鉞別名傳以戚爲斧以揚爲鉞
鉞大而斧小大公六韜云大阿斧重八斤一名天鉞
是鉞大於斧也勲按鉞亦名揚者鉞揚二字爲雙聲
故知揚爲鉞聲之轉鉞卽揚也如易夬卦辭揚于王
庭鄭注訓揚爲越謂揚于王庭卽越于王庭也他如
發揚之轉爲發越亦類是

其蘇

書曰猷我后后來其蘇趙注云待我君來則己蘇息
而已勲按息卽生也禮記樂記蟄蟲昭蘇鄭注云更
息曰蘇正義云言蟄蟲之類皆埋藏其體近於死今

復得活死而更息也據此則更息卽更生如左傳襄
十年蘇而復上者三疏云蘇者死而更生之名也小
爾雅廣名云死而復生謂之蘇蘇本作穌廣雅釋詁
一徑訓穌爲生亦其一證

非身之所能爲也

或曰世守也非身之所能爲也趙注云土地乃先人
之所受也世世守之非己身所能專爲勲按趙注以
專釋爲其義未確竊謂爲與違通如荀子臣道篇君
子不爲也注云爲或爲違蓋爲違雙聲又爲合韻抑
或傳寫之訛皆未可知此節當作非身之所能違違

訓去故下云效死勿去

爲我願之

公孫丑管仲曾西之所不爲也而子爲我願之乎疏
云孟子言管仲曾西之所不願爲也而子以爲我願
比之乎勲按疏訓爲爲以爲必用以字增成其義而
後可讀不知古人爲與謂通用爲我願之卽謂我願
之也如禮記禮器誰謂由也而不知禮乎家語公西
赤問篇作孰爲左傳莊二十二年是謂觀國之光史
記陳杞世家作是爲大戴禮文王官人篇此之爲考
志也逸周書作謂考志墨子公輸篇宋所爲無雉兔

鮒魚者也宋策作所謂皆是

蹶者

今夫蹶者集注釋蹶爲顛躓顛之本字作躓經傳多借顛爲之說文躓跋也跋卽沛之本字馬融論語注云顛沛僵仆也躓或借蹶爲之詩豳風狼跋其胡載蹶其尾毛傳云蹶踣也與說文躓訓踣合亦僵仆之意然說文蹶下云僵也一曰跳也跳下云蹶也一曰躍也廣雅釋詁亦云蹶跳也當以跳義爲長禮記曲禮足毋蹶鄭注云蹶行遽貌越語云蹶而趨之惟恐弗及呂氏春秋貴直篇云狐援聞而蹶往過之一言

蹶而趨一言蹶而往過皆不見有僵仆之義非跳而何趨謂疾行跳則行且躍較趨爲尤疾趨與蹶作氣使然氣勝者心無不動矣

桑土

詩云徹彼桑土趙注云桑土桑根也訓與毛傳合疏不得其義乃云取桑根之皮土勲按土爲杜之省文借字據毛詩釋文土韓詩作杜義同方言卷三葦杜根也東齊謂根曰杜郭注引詩亦作桑杜又詩縣篇自土沮漆漢書地理志作自杜長發相土荀子解蔽篇作乘杜皆可互證爾雅釋木以杜爲甘棠此杜之

本義引伸其義亦可訓根如廣雅釋木杜根也正與

毛傳合

有大焉

館

大舜有大焉集注云言舜之所爲又有大於禹與子
路者勲按此經朱子補出又字文義始明竊謂有卽
又之借字古書借有爲又者極多不勝枚舉大舜有
大焉謂舜之善量又大於禹與子路也讀有爲又文
義自通

如就見

浙

公孫丑寡人如就見者也趙注云若言就孟子之館

相見也有惡寒之病不可見風勲按趙注以若言釋如字合下二句作一氣讀然玩本句者也語意不與下二句緊連蓋如字有本義有引伸之義如訓若爲本義引伸其義凡云相若者亦謂之相當如宋策夫宋之不足如梁也注正訓如爲當此經寡人如就見者也猶云寡人當就見者也齊王此言甚得體本欲托疾而先言當就見語頗婉然

夫旣或治之

夫旣或治之趙注云夫人旣自謂有治行事我將復何言哉勲按趙注訓夫爲夫人訓或爲有當云彼旣

有人治事而復補出自謂二字者以此治事專指王驩本身也不知古人文義最顯白無待幹旋或當讀爲咸如易咸或承之羞鄭本或作咸家語正論不爲末或曰義注云或左傳作咸皆是夫旣或治之卽夫旣咸治之咸與皆同義蓋王驩以行事自專并無一事商於孟子故孟子云彼旣皆治之予復何言江晉三先生云此條甚精愚更謂夫非虛字卽指王驩左傳夫不惡女乎夫字指大子痤也言王驩已皆治矣予何言哉

且比化者

且比化者無使土親膚集注云比猶爲也勲按比有
周義漢書董賢傳集注云比謂比周王尊傳集注云
比周也據檀弓棺周於衣槨周於棺卽所以比化者
但恐周之不厚則棺槨先膚而化土必親膚故復云
無使土親膚

絕長補短

滕文公今滕絕長補短將五十里也集注云絕猶截
也勲按說文截斷也絕斷絲也二字音義並同故彼
此通用如釋名釋言語云絕截也如割截也穆天子
傳一天子北征乃絕漳水注云絕猶截皆可證集注

之精截長補短卽割角成方借東湊西之法有半縱
乘廣者如截半縱中分爲二倒而補下兩邊便成方
形是也有半廣乘縱者如截西北角以補東南角亦
成方形是也有半勾乘股者如截東北勾倒上以補
東南是也有半股乘勾者如截東南股尖一半倒下
以補西北是也又有梯形折廣斜形折廣諸法形雖
委曲皆可算折爲方

可謂曰知

百官族人可謂曰知趙注可字無訓集注云可謂曰
知疑有闕誤或曰皆謂世子之知禮也勲按此經無

闕誤或說得之可有合義如荀子解蔽篇則不可道
而可非道注云可謂合意也正名篇故可道而從之
注云可道合道也可謂曰知卽合謂曰知也上經云
父兄百官皆不欲此經云可謂曰知猶云皆謂曰知
明矣至僞疏於可謂曰知上加乃曰二字謂百官族
人皆以爲知禮能行三年之喪乃曰可謂曰知更屬
添設

必慢其經界

暴君汙吏必慢其經界趙注慢字無訓集注云暴君
汙吏則必欲慢而廢之也勲按朱子因慢字補出廢

字文義方明竊謂慢其經界卽敗其經界也如方言
十二及廣雅釋詁三皆訓慢爲敗可證必敗其經界
者暴君因此侵奪鄰國汙吏因此侵占鄰邑也

將爲君子將爲野人

書

夫滕壤地褊小將爲君子焉將爲野人焉趙注云爲
有也雖小國亦有君子亦有野人勲按爲與有古通
用如梁惠王篇善推其所爲而已矣說苑貴德篇爲
作有滕文公篇人之有道也有亦與爲同猶言民之
爲道也他如憮然爲閒爲閒不用爲閒卽有閒皆可
類推爲有二字同屬喉音喻母故有多轉爲爲趙氏

知語音流變之由卽以有釋爲而經旨已得爾雅方言皆訓將爲大亦此經確詰言滕雖小大有君子焉大有小人焉得其字義不必曲折斡旋自然顯白

二十五畝

書

餘夫二十五畝趙注云餘夫者一家一人受田其餘老少尙有餘力者受二十五畝半於圭田謂之餘夫也集注引程子之說云一夫上父母下妻子以五口八口爲率受田百畝如有弟是餘夫也年十六別受田二十五畝俟其壯而有室然後更受百畝之田勲按餘夫不止弟有子亦號餘夫但子與弟必待年二

十以後始受二十五畝之田據詩載芟侯疆侯以周禮遂人以疆予任阡皆謂民有餘力爲疆卽餘夫也曲禮二十曰弱冠則知人自二十以前皆弱而未疆血氣堅剛多成於二十以後後鄭載師注引食貨志云農民戶一人已受田其家衆男爲餘夫亦以口受田如比賈氏疏云案孟子云圭田五十畝餘夫二十五畝彼餘夫與正夫不同者彼餘夫是年二十九以下未有妻受口田故二十五畝若三十有妻則受夫田百畝陳氏禮書以爲附會之論非也自年二十一歲以後二十九歲以前統稱餘夫皆受田二十五畝

及三十壯而有室則其父田已歸公矣古人三十而娶卽早生子子年三十父年必六十無有田不歸公者是受百畝田父母從此就養合己與妻爲四人又或有幼弟未受餘夫田者大約爲五口之家何休注公羊宣十五年傳云多於五口名曰餘夫又似不論年長年少凡有多於五口者卽名餘夫卽受田二十五畝亦無是理且五口外皆餘夫則是家盡限以五口孟子何以言八口之家乎近儒姚氏鼐說周禮大司馬職上地食者三之中地食者半下地食者三之一云周時小司徒考夫屋出地貢者三三相任故

令賦必以三夫起算凡夫受田百畝百畝之田率挾
五人治之合三夫爲屋當用十有五人上地地美雖
有餘夫而畝弗增所入足食七人或八人當十五人
之半下地之農餘夫益少地彌薄足食五人或六人
是三家之一之人也故餘夫二十五畝爲下地計也
勲謂此說未精三等地皆別有餘夫之田如周禮遂
人職上地田百畝萊五十畝餘夫亦如之中地田百
畝萊百畝餘夫亦如之下地田百畝萊二百畝餘夫
亦如之據三等地皆於正夫受田後別言餘夫受田
之法則知餘夫有田無分於三等地但二十五畝外

仍有萊田耳至趙注云老少尙有餘力者受田二十
五畝此又兼以老者爲餘夫蓋餘夫中亦有老者彼
自有室以後至老無子女仍是號爲餘夫仍是限以
田二十五畝故趙注兼以老者爲餘夫注又云半於
圭田止言畝數如此非謂二十五畝卽名圭田也乃
邵武僞疏云其餘老少尙有餘力者亦受此圭田二
十五畝則甚誤矣

衣褐

許子衣褐趙注云以毳爲之若今馬衣也或曰褐臬
衣也一曰粗布衣也疏云許子不自紡織其布爲衣

以其卽著臬布也勳按趙注謂褐以毳織之故褐寬
博集注亦訓褐爲毛布褐與毳通廣韻毳毛布也廣
雅毳屬也屬者織毛爲衣也後漢烏桓傳云婦人能
織毳毳皆非孟子之義也蓋毛布亦褐之一義豳風
七月詩無衣無褐鄭箋釋褐爲毛布彼以褐對衣言
確指毛布此經當依疏說專指臬衣爲是說文云褐
編臬鞮一曰粗衣此取未績之麻編之爲足衣一曰
粗衣者引伸之義言凡粗衣皆可編麻爲之不止一
鞮也如史記秦始皇紀寒者利裋褐索隱云褐編衣
也漢書貨殖傳短褐不完師古亦訓褐爲編臬衣皆

與說文合據此知許子衣褐確是編臬爲粗衣陳相
正以衣褐諱過織字謂許子不必織麻爲衣不過編
臬爲衣而已若云織毛爲布仍是必織布而後衣顯
與經旨不合至於冠必用細布不可編臬爲之又不可
以自織故曰以粟易之

敷治

舉舜而敷治焉趙注云敷治也書曰禹敷土是言治
其土也勲按如趙注訓敷爲治是敷治爲複語蓋敷
爲傅之借字如禹貢禹敷土史記夏本紀敷作傅此
二字通用之證說文訓傅爲相左傳僖二十八年鄭

伯傳王注亦云傳相也當日主治在堯故使舜言敷

治猶言相治云爾

其無罰

滕文公后來其無罰與梁惠篇言后來其蘇互異王

氏鳴盛尚書後案云其蘇無罰互異乃古人引經不

拘處猶上文易一為始易始為載耳勲按易一為始

易始為載字異而義同此易蘇為無罰亦文異而義

同說文罰辜之小者此本義如此引伸其義殺亦謂

之罰如廣雅釋詁一訓罰為殺殺與生正相反蘇者

生也言無罰則亦生矣蘇與無罰義實相成

往將食之

滕文公匍匐往將食之趙注將字無訓勲按荀子成相篇吏謹將之無鉞滑注云將持也往將食之卽往持食之若作將然之詞與下句文義不合

辟纁

妻辟纁趙注云緝績其麻曰辟練其麻曰纁故曰辟纁疏云釋名云辟分辟也纁布纁也勲按辟與西京賦擘肌分理之擘同擘亦分也廣雅釋言訓擘爲剖卽其義謂擘麻皮爲絲也喪大記絞一幅爲三不辟孔疏云不辟者辟擘也此亦假辟爲擘又如詩栢舟

寤辟有標釋文云辟本作擘內則鬻爲辟雞卽擘雞
皆辟擘通用之證說文訓擘爲搗卽分裂之義擘从
手故謂手大指爲巨擘以手大指獨開不與餘四指
連合故也說文纁布縷也言布縷以別乎絲縷趙注
謂凍其麻曰纁者以縷有凍者有不凍者若斬衰齊
衰大功小功之縷皆不凍總衰之縷則凍之若吉服
之縷無不凍者不凍者謂之篠說文篠未凍治纁也
統呼曰縷

蓋祿萬鍾

浙

兄戴蓋祿萬鍾趙注云兄名戴爲齊卿食采於蓋祿

萬鍾勲按左傳昭三年齊舊四量豆區釜鍾四升爲豆各自其四以登於釜釜十則鍾是鍾容六斛四斗祿至萬鍾亦云多矣據史記河渠書韓使水工鄭國閒說秦令鑿涇水爲渠渠就用注填闕之水溉澤鹵之地四萬餘頃收皆畝一鍾鄭氏箋甫田歲取十千云歲取十千於井田之法則一成之數也通十爲成成方十里成稅百夫其田萬畝上地穀畝一鍾是鄭箋與河渠書合漢書食貨志云一夫治田百畝歲取畝一石半爲粟百五十石歲有上中下上孰其收自四中孰自三下孰自倍卽以中孰自三計之百畝收

粟四百五十石粟百五十石得二百斛四百五十石
得六百斛四萬五千石得六萬斛約萬鍾矣然一成
九萬畝之田三分去一餘六萬畝又二而當一僅得
三萬畝準以九一之法畝收一鍾實得三千三百鍾
又三分鍾之一何以言十千言十千者一縣之田耳
先王之制外諸侯公之孤食都公侯伯之卿食縣下
大夫食甸齊爲侯國卿當食縣縣合四甸卽四成之
地汪君手存從余說而申之云甸與成二法原相通
澤疑沿邊治溝洫之夫不出賦未必不出稅也出賦
當計甸制祿當計成縣之所收除王食四之一仍餘

三成恰得萬鍾之數勲又按左傳襄二十七年公與免餘邑六十辭曰惟卿備百邑方里爲井四井爲邑方二里百邑卽方二十里之縣亦合得祿萬鍾杜注以爲此一乘之邑非四井之邑未確若晉語叔向言大國之卿一旅之田此主一甸之不易者言非異制也至七國時與春秋不同孟子曰辭十萬而受萬是其爲卿於齊嘗受祿十萬鍾卿得受祿十萬鍾者以七國之君地方千里妄自稱王乃有千乘之家是上卿田祿擬天子三公古制內諸侯三公之公田有四都自公而下雖孤亦止一都之田其祿不足二萬鍾

齊卿之祿十萬鍾約計四都之地乃有此數而萬鍾
乃下大夫之祿也卿祿既擬王朝之公下大夫亦擬
王朝之大夫當時萬鍾不爲重祿故齊宣王養孟子
弟子卽以萬鍾許之非謂卿祿止此數也

浙江圖

四書拾義四

昌楨校字

孟子

四書拾義五

績溪胡紹勳學

慈孫

離婁雖孝子慈孫慈亦孝也孝經若夫慈愛恭敬正義云或曰慈者接下之別名愛者奉上之通稱劉炫引禮記內則說子事父母慈以甘旨喪服四制云高宗慈良於喪莊子曰事親則孝慈此並施於事上如劉炫此言則知慈是愛親也勳按禮記曲禮不勝喪乃比於不慈不孝禮運禮行於祖廟而孝慈服焉孫之愛祖稱孝亦稱慈猶子之愛親稱孝亦稱慈也慈

孫猶孝孫

不虞之譽

有不虞之譽趙注云虞度也勲按左傳桓十一年且
日虞四邑之至也昭六年始吾有虞於子杜注皆訓
虞爲度又廣雅釋詁虞望也左傳昭二十六年藪之
薪蒸虞候守之正義云立官使之候望故以候望爲
名此經不虞之譽訓爲不望之譽尤切

又何難焉

於禽獸又何難焉趙注云無異於禽獸又何足難矣
疏云旣爲禽獸於我又何足責難焉勲按此訓難爲

難易之難不合經旨難卽患也王氏經義述聞云於禽獸又何難焉言於禽獸又何患也故其下文云無一朝之患也

于父母

萬章號泣于閔天于父母劉向列女傳母儀傳引作號泣日呼閔天呼父母王氏經義述聞云列子周穆王篇王乃嘆曰於于釋文音嗚呼是其例也史記屈原傳人窮則反本故勞苦倦極未嘗不呼天也疾痛慘怛未嘗不呼父母也文義與此相近不然則舜往于田時不在父母之側何得曰于父母乎趙注不讀

于爲呼失之勲按說文亏於也象乞之舒兮語之餘也義本相近于乎之通用者如易需彖傳位乎天位石經作位于莊子人閒世篇且幾有剪乎釋文云乎崔本作于列子黃帝篇今汝之鄙至此乎釋文云乎本又作于是也乎與呼通如詩抑篇於乎小子以乎爲呼可證

于予治

惟茲臣庶汝其于予治趙注云惟念此臣衆汝故助我治事勲按趙氏訓于爲助甚合古義于於二字經傳通用爾雅釋詁於代也于予治謂代予治也

殺三苗

殺三苗于三危非殺其君也據文十八年左傳流四凶族劉向云舜有四放之罰皆言流言放而不言殺故知殺三苗亦流放之謂虞書作竄說文作窳考古音殺聲竄聲窳聲同部昭元年左傳周公殺管叔而蔡蔡叔杜注云蔡放也釋文云上蔡字音素葛反放也說文作檠音同蔡从祭聲史記引尙書作遷遷聲與祭聲爲通韻皆可互借說文訓檠爲糗檠齊民要術凡云檠不通於中國又說文訓檠爲糗檠齊民要術凡云檠米皆作殺米殺又檠之借字也汪君手存云竊疑孟

子書本作粲書之者脫米誤作殺爾說文粲散之也
作粲正合尙書分北三苗之義凡物自匿曰竄納而
塞之曰斂然物之自匿必有迫之使不得不匿者安
知尙書竄非古文斂義之假借字乎安知孟子殺非
今文粲字之誤脫去米字乎近人攻僞古文尙書凡
與史記說文異者必盡改從史記說文然古文尙書
雖僞究未必無一真字也卽衛包疑亦未能盡改

子遺

周餘黎民靡有子遺趙注云民無子然遺脫不遭旱
災者非無民也勲按毛傳云子然遺失正義云旣言

有餘則是有民存矣而復言靡有子遺無有子遺乃是悉盡之言故知無有子遺謂餓病也其意言死者已死者又餓無有子然不餓病者非謂盡死無子然也勲謂毛傳趙注之說皆與詩辭不合孟子明言信斯言也是周無遺民也則靡有子遺卽謂無遺民甚顯白據方言二及廣雅釋詁三皆訓子爲餘靡有子遺正謂周之黎民皆餓死而無餘也若云非謂盡死無子然乃孟子以意逆志則可爾不得據此以釋詩辭

主祭主事

使之主祭而百神享之是天受之使之主事而事治
百姓安之是民受之也疏云書云納于大麓是堯薦
舜於天也烈風雷雨弗迷是天受之也所謂百神享
之亦可知也慎徽五典納于百揆是暴之於民也五
典克從百揆時叙是民受之也所謂百姓安之亦可
知也曰黎民於變時雍是也勳按此經專指舜攝政
而言主祭攝祭也主事攝事也舜典正月上日受終
于文祖受終者堯於是終帝位之事而舜受之卽攝
位時也主祭如類上帝禋六宗望山川徧羣神皆是
主事如巡狩朝覲封山濬川以及制典刑用流放皆

是自月正元日舜格于文祖一節以下舜已卽位矣
故祖考來格亦足驗百神之享此特爲天子時也五
典克從亦足驗百姓之安此特爲司徒時也事非其
時不得牽合

書

微服

圖

微服而過宋趙注云變更微服而過宋勲按變更微
服非聖人所爲且桓司馬素識孔子雖變更微服亦
安必不遭其害竊謂微服卽微行說文彳部云微隱
行也此云微服服亦訓行也尙書盤庚先王有服康
誥子弗祇服厥父事孔傳皆訓服爲行文十八年左

傳服讒蒐慝注亦云服行也蓋孔子過宋恐桓魋害
己故微行而過之豈變服乎長洲縣陳碩甫先生爲
勲得一證云詩七月遵彼微行傳曰微行牆下徑也
微服正與此微行同意孔子從小路過宋不由大道
也勲按廣雅釋詁二以小釋微足證微行確是小路
從小路亦隱行之一義其說極精

頑夫

頑夫廉趙注云頑貪之夫更思廉潔勲按盡心下聖
人百世之師章注亦訓頑爲貪據韓詩外傳漢書王
貢傳序後漢王吉傳王暢傳袁宏漢紀晉書羊祜傳

北史鄭述祖傳藝文類聚長短經引頑夫並作貪夫
南史稱任昉能使貪夫不取與懦夫有立志對文亦
本孟子語說文頑訓榘頭與貪義絕異竊謂頑當讀
爲忼說文心部云忼貪也忼爲本字頑爲同聲借字
諸書引頑夫作貪夫以其字頑而義忼故以貪字代
之猶韓詩外傳引薄夫敦作薄夫厚以其字敦而義
惇故以厚字代之此經趙氏知頑爲忼之借字因以
貪釋頑確不可易

市井

在國曰市井之臣趙注云市井謂都邑也民會於市

浙

故曰市井之臣勲按漢書貨殖傳引管子商相與語
財利於市井師古曰凡言市井者市為交易之處井
為其汲之所故總而言之也蓋市為都邑之市孟子
言在國即可該都邑不必專指國中市中有井便於
取水易曰改邑不改井謂市井也在野亦閒有井而
無井之地居多以田閒處處有水道不若市中之必
不可無井也

多賴

告子富歲子弟多賴趙注云賴善也集注云賴藉也
豐年衣食饒足故有所賴藉而為善勲按集注訓賴

爲藉多一曲折不若趙注訓賴爲善之精賴與暴對
暴爲惡賴卽爲善也據國策衛策云爲魏則善爲秦
則不賴矣不賴卽不善廣雅釋詁一亦訓賴爲善皆
與趙注合

書

志於穀

羿之教人射必志於穀趙注云穀張弩付的者用思
專時也勲按趙氏注羿不爲拙射變其穀率云穀弩
張嚮表率之正體望之極思用巧之時不可變也據
兩注一言用思一言用巧此射之所以爲善也謂穀
爲張弩者義同說文文選射雉賦捧黃閒以密穀亦

言張弩此本義也張弓亦稱彀此引伸之義也不云必於彀而云必志於彀正見極思用巧務期其中然後卽安若謂張弓以滿爲限猶是專以力言之爾雅釋詁云彀善也射之善在巧而不徒在力

堯之服

子服堯之服趙注云堯服衣服不踰禮也勲按孝經言卿大夫之孝曰非先王之法服不敢服非先王之法言不敢道非先王之德行不敢行亦先叙服而後叙言行都人士詩狐裘黃黃兼及出言有章行歸於一周此皆言行與服並論然謂堯服爲法服則可謂桀

服皆非法服恐未必然桀言非仁義之言桀行非仁義之行至桀服不聞其譎詭趙注云桀服譎詭非常之服亦臆斷爾竊謂服當訓事詩關雎寤寐思服六月其武之服下武昭哉嗣服板我言維服噫嘻亦服爾耕鄭箋皆訓服爲事本爾雅釋詁又楚辭天問舜服厥弟注亦以爲舜事厥弟然則服堯之服者事堯之事也服桀之服者事桀之事也事堯事則爲堯事桀事則爲桀方與言行二句一例中庸言前定事前定行前定事與言行三者並舉正與此經同

樓諸侯

五霸者摟諸侯以伐諸侯者也趙注云五霸強摟牽諸侯以伐諸侯勲按踰東家牆而摟其處子注亦訓摟爲牽據說文手部摟曳聚也詩山有樞弗曳弗婁毛傳云婁亦曳也趙注以牽釋摟亦曳義之引伸也許氏又訓摟爲聚本爾雅釋詁釋詁云摟聚也孟子摟諸侯與摟處子字同而義異摟處子當訓牽摟諸侯當訓聚聚猶會也聚諸侯以伐諸侯猶言會諸侯以伐諸侯也

不亮

浙

君子不亮惡乎執趙注云亮信也疏云言亮而不言

信者蓋亮之爲義其體在信其用在明君子之道惟明爲能明善在信爲能誠身不明乎善不能誠其身矣是則君子不亮又惡乎執與以其誠也者擇善而固執之者也勲按今本說文無亮字傳注多訓亮爲明如後漢蘓竟傳注及文選稽叔夜雜詩皎皎亮月注並云亮明也文選謝靈運初發石首城詩寸心若不亮注云亮猶明也據吳志吳子亮字子明蜀志諸葛亮字孔明則亮之訓明爲本義爾雅釋詁訓亮爲信者亮爲諒之借字也又有借諒爲亮者如方言訓諒爲知廣雅釋詁三訓諒爲智是也蓋經籍亮諒本

通用如書說命王宅憂亮陰詩柏舟不亮人只釋文
並云亮本作諒可證邵武偽疏未審假借之義乃云
亮之爲義其體在信其用在明直欲并亮諒二字爲
一字不知亮字本義可訓明不可訓信其訓信者皆
諒之借字疏說不可從



拂士

入則無法家拂士趙注云無法度大臣之家輔弼之
士勲按經言拂注言弼蓋以拂爲弼之借字也說文
訓拂爲過擊弼作弼輔也又解芻字云弼或如此是
芻卽弼之或體字惟其从弗作芻故又通作拂拂亦

彌之借字也如管子四稱篇近君爲拂遠君爲輔拂與輔並列非彌而何荀子臣道篇功伐足以成國之大利謂之拂注云拂讀爲彌可證拂亦通作佛如周頌敬之詩佛時仔肩鄭箋訓佛爲輔又或借彌爲拂如漢書刑法志君臣故彌茲謂悖注云彌猶相戾也是謂彌爲拂之借字蓋拂爲輕唇音彌爲重唇音古人輕重唇音不甚區別故彌與拂多以聲近通用

歛然

盡心如其自視歛然趙注云言人旣自有家復益以韓魏百乘之家其富貴已美矣而其人歛然不足自

知仁義之道不足也勲按孟子音義云欲然張音坎
字林云欲得也今詳此義內顧不足而有所缺然也
據音義所引字林之說與說文合廣雅釋詁一亦訓
欲爲欲釋詁三訓欲爲貪貪亦欲也欲之本義止此
張鑑訓爲內顧不足而有所欲言有所欲復以內顧
不足增成其義失之矣趙注專訓欲然爲不足者蓋
以欲爲坎之借字讀欲爲坎故言不足也坎欲經籍
通用如易坎京劉本作欲詩伐檀坎坎伐輪兮石經
魯詩作欲欲左傳襄二十六年欲用牲欲皆坎之借
字也易說卦傳釋坎爲陷有缺陷之義自視欲然者

處盈若虛不自滿假之謂也

所存者神

夫君子所過者化所存者神趙注云聖人如天過此
世能化之存在此國其化如神勲按趙注以在釋存
據爾雅釋訓存存在也注云存即在公羊隱三年傳
有天子存注孟子離婁下以其存心也注告子上雖
存乎人者注荀子非十二子使天下混然不知是非
治亂之所存者有人矣注呂覽應同召寇則無以存
矣注皆訓存爲在所存即所在也神與化對文化主
所過之地言神亦主所在之地言爾雅釋詁云神治

四書抄卷五
十一
也所存者神謂所在之地無不治也趙云其化如神
猶是比擬之辭而非神之本義

易其介

柳下惠不以三公易其介趙注云介大也柳下惠執
宏大之志不恥汙君不以三公榮位易其大量也勲
按訓介爲大本爾雅釋詁然云不以三公易其大不
知其大謂何必待注者補出量字然後可讀恐非經
旨陸氏音義云介謂特立之行文選注引劉熙注云
介操也操卽特立之意楚辭悲回風介眇志之所惑
兮注訓介爲節義亦與劉注同書秦誓如有一介臣

疏云一介謂一心耿介漢書陳湯傳使百姓介然有秦民之恨注云介猶耿耿不易其介者謂不易其耿介之節操也集注以爲有分辨之意當讀與界同

人莫大焉

書

人莫大焉亡親戚君臣上下翟氏灝攷異云王氏翼注云此作一句讀言人之罪莫大於亡親戚君臣上下者勲按王氏以於釋焉據公羊隱二年傳託始焉爾注云焉爾猶於是也宣六年傳則無人聞焉者注云焉者於也江晉三先生云焉字篆文類烏於古文烏字因於而轉爲烏因烏而轉爲焉皆傳寫之訛也

二女果

被衿衣鼓琴二女果趙注云果侍也以堯二女自侍
 勲按果當讀為媠故趙注以待釋之說文媠姬也一
 曰女侍曰媠引孟子二女媠為證是許氏所據古本
 孟子作媠與趙氏注本作果者不同趙氏亦知果即
 媠之省文借字因主媠字立訓疏未達其旨專向果
 字推求反謂趙氏惑於許慎之說非也

不理於口

貉稽曰稽大不理於口趙注云理賴也謂孟子曰稽
 大不賴人之口疏云稽大不能治人之口使不訕其

己者勲按疏不得注義廣雅釋詁三訓理爲治與說文治玉之訓合疏說本此而非注義也注訓理爲賴者理當讀爲俚廣雅釋言云俚賴也漢書季布欒布田叔傳贊集注引蘇林亦訓爲賴古字理俚通用如莊子盜跖篇勝子不自理釋文云理本作俚可證趙氏謂理爲俚之借字故訓爲賴然理讀如字亦有可通之義如說文解順爲理廣雅釋詁一解理爲順不理於口謂不順於人之口卽所謂橫逆也

山徑

山徑之蹊閒趙注云山徑山之領勲按領卽嶺也如

漢書嚴助傳輿而踰領嶺亦作領徑當讀為陁陁為
本字徑為借字猶左傳僖二十五年趙衰以壺飧從
徑借徑為經釋文云一讀徑為經是也廣雅陁陁也
山之陂陀不平者為陁爾雅陂者曰陁是也又連山
中斷亦為陁爾雅山絕陁邢疏云謂山形連延中忽
斷絕者名陁是也山嶺山絕皆有蹊可兼兩義

一閒耳

然則非自殺之也一閒耳趙注云一閒者我往彼來
閒一人耳勲按經無人字注以人字增成其義如此
當云閒一不當云一閒既云一閒而訓為一人之閒

究與經文詞例不符蓋自殺對代殺言閒者代也爾
雅釋詁訓閒爲代詩桓皇以閒之傳儀禮燕禮乃閒
歌魚麗注周語新不閒舊注並同此經謂父兄非自
殺人之殺我父兄者特爲我一代耳

復爲發棠

國人皆以夫子將復爲發棠趙注云孟子嘗勸齊王
發棠邑之倉以賑貧窮時人賴之今齊人復饑陳臻
言一國之人皆以爲夫子將復若發棠時勸王也勳
按經言復爲發棠注言復若發棠若與爲義不相蒙
其說非也爲當訓使如易井爲我心惻注魯語其爲

後世昭前之令聞也注並云爲猶使也又晉語爲後
世之見之也注徑以使釋爲尤其明證將復爲發棠
者謂將復使齊王發棠邑之粟也僞疏不明爲字之
義乃云將復發棠邑之粟直視爲字爲贅文而刪之
更不可解

浙江圖

四書拾義五

國琛校字

跋

右四書拾義五卷吾師績溪胡文甫先生
所箸也師清貧力學善治經平日雅服王
石臞段若膺諸先生之學以其遺意讀秦
漢以上諸古書紛紜輻輳豁然確斯鉢及
弟鍾從學有年課以舉子業兼示讀書當
從聲音故訓始以爲讀書不通聲音故訓
比之瞽者議色聾者論聲終無當焉竊思

四子書爲六經管鑰學者未讀六經先讀
四子書然微詞古義先儒或有未詳吾師
心苦分明所至冰釋發疑正讀本漢經師
箸有四書拾義疑義及論語孟子學庸文
字箋異等書其于羣經則有周易春秋諸
文字箋異凡三四十册自謂尙須刪訂不
欲輕出問世銛曩時會錄拾義二册藏諸
篋笥五六年于茲矣今春偕弟鏈敬請于

師釐爲五卷先繕寫付梓并述師所以爲
學與所以爲教者于簡末若是書精深奧
衍海內讀者自知之無俟門弟子覩縷也
時道光甲午年仲夏初吉受業門人歙汪
運鋹敬跋

浙江



圖書拍賣



浙江圖書館

二

097.01
4722
c2

142392
v.2

浙江省立
圖書館



浙江圖書館
借閱者注意

- (一)借閱此書須加意愛護勿失原有形狀
- (二)損壞或遺失應照原價賠償
- (三)借閱以二星期為限期滿應即繳還遇必要時得續借一次
- (四)逾期不還須照章繳納罰金
- (五)此書如值需用時本館得通知借者須即繳還

(目五)



浙江圖書館




浙江圖書館





浙江圖書館



Centimetres **TIFFEN** Color Control Patches © The Tiffen Company, 2007
Blue Cyan Green Yellow Red Magenta White 3/Color Black